

Inatsisartut Suleriaasissaannut siunnersuut**Kapitali 1***Ataatsimiigiaqqusineq, qinigaanerup misilinneqarnera, qinigaasinnaaneq*

§ 1. Nutaamik qinersinerup kingornatigut sapinngisamik piaartumik, kingusinnerpaamillu ullut 45-t qaangiunnerisigut Inatsisartut katersuutissapput. Ataatsimiigiaqqusisuusaaq ilaasortaq Inatsisartunut sivisunerpaamik ilaasortaasimasoq, imaluunniit arlallit sivisoqatigiimmik Inatsisartunut ilaasortaasimappata angajulleq. Ilaasortap taassuma Inatsisartuni isumaqatigiinniarnert aqussavai qinigaanerup misilinneqarnissaata Inatsisartullu Siulittaasoqarfiannik qinersisoqarnissaata tungaanut.

Imm. 2. Inatsisartut ilaasortamik akornannit Qinigaanerup Misilinneqarnissaanut Ataatsimiititaliaagallartumik pilersitsissapput. Ataatsimiititaliap ilaasortarissavai ilaasortaq imm. 1-imi taaneqartoq, siulittaasuusussaq, taassumalu toqqagai ilaasortat allat sisamat. Ataatsimiititaliap ilaasortaasa sinniisussaannik toqqaasoqassanngilaq.

Imm. 3. Ataatsimiititaliap ilaasortassatut qinikkat qinigaasinnaassusiat pillugu Inatsisartunut inassuteqartassaaq. Ilaasortaq imm. 1-imi taaneqartoq ataatsimiititaliap sinnerlugu inassuteqaammik Inatsisartunut saqqummiussissaaq.

Imm. 4. Inatsisartunut, Naalackersuisunut, Inatsisartut ataatsimiititaliaannut imaluunniit Inatsisartunut sinniisuuffissamat allamat qinigaaneq Inatsisartunit akuerineqarsimatinnani kimilluunniit akueriumannginneqarsinnaanngilaq.

§ 2. Inatsisartunut ilaasortaq pinerluttulerinermi inatsit naapertorlugu inaarutaasumik eqqartuussissutikkut imaluunniit akiliisitaanissamik akuersissuteqarnikkut pinerluteqarsimasutut pineqaatissinneqarpat imaluunniit pinerluttulerinermi inatsit naapertorlugu Inatsisartunut ilaasortaasaminut nalinginnaasumik isigineqarnermini naleqqukkunnaarutigisaminik pineqaatissinneqarpat § 7, imm. 1, nr. 2 naapertorlugu Qinigaanerup Misilinneqarnissaanut Ataatsimiititaliap inassuteqarnera naapertorlugu Inatsisartut aalajangissavaat iliuuserisaaq ilaasortap eqqartuunneqaatigisaa pineqartup Inatsisartunut ilaasortaaginnarnissaanut naleqqukkunnaarutaanersoq.

Kapitali 2

Inatsisartut Siulittaasuat aamma Inatsisartut Siulittaasoqarfiat

§ 3. Inatsisartut ilaasortamik akornannit Inatsisartut Siulittaasussaat siulittaasullu tullii sisamat nutaamik qinersisoqareernerup kingorna inissitsiterfiusumik katersuunnerminni isumaqatigiinniutigineqanngitsumik, tamatumalu kingorna ukiut tamaasa Inatsisartut ukiuata aallartinnerani, qinertassavaat.

Imm. 2. Qinigassanngortittoq Inatsisartut Siulittaasuattut qinerneqassaaq ilaasortat najuuttut affaanit amerlanernit (amerlanerussuteqarluinnartunit) taaneqaruni. Qinigassanngortittut arlaat amerlanerussuteqarluinnartunit taaneqanngippat qinersisoqaqqissaaq. Qinersinermi tassani qinigassanngortittoq amerlanerussuteqarluinnartunit taaneqanngippat qinigassanngortittut marluk aappasaanik qinersinermi amerlanerpaanik taaneqartut pingajussaanik taasinermi taasissutigineqassapput. Taasinerit amerlaqatigiippata qinersineq makitsinikkut aalajangerneqassaaq.

Imm. 3. Aammattaaq Inatsisartut § 27, imm. 1 naapertorlugu qanoq amerlatigineq naapertorlugu qinerseriaaseq malillugu, ataatsikkoortumik qinissavaat siulittaasup tullia siulleq, tulliaata aappaa, pingajuat sisamaallu, taakkulu Siulittaasoq peqatigalugu Inatsisartut Siulittaasoqarfiattut atuutissapput. Siulittaasup tullissaanik qinersinermi Siulittaasup qinikkatut inissaq siulleq, qinersisarnerit eqqarsaatigalugit suleqatigiinnissamik isumaqatigiissuteqarsimasut attavigisaasa pissarsiarisassaat, pissavaa.

Imm. 4. Tamatumunnga peqatigitillugu Inatsisartut Siulittaasoqarfianni ilaasortat ataasiakkaat sinniisussaannik Inatsisartut qinersissapput.

Imm. 5. Inatsisartuni amerlanerussuteqartut, Inatsisartunut ilaasortat affaat sinnerlugit amerlassusillit, akuersissutigisinnaavaat Inatsisartut Siulittaasuat imaluunniit siulittaasup tulliiisa ilaat imm. 1 malillugu tullianik qinersinissap tungaanut atuukkunnaarsinneqassasoq. Inatsisartut Siulittaasuat Inatsisartunit atuukkunnaarsinneqarpat Inatsisartut Siulittaasoqarfiat tamarmiusoq tunuassaaq. Nutaamik qinersineq imm. 2-mi 3-milu periusereqqusaasut malillugit ingerlanneqassaaq.

Imm. 6. Aammattaaq Inatsisartut Siulittaasoqarfiannik nutaamik qinersineq imm. 2-mi 3-milu periusereqqusaasut malillugit ingerlanneqassaaq Siulittaasoq Inatsisartut Siulittaasuattut tunuarumalluni allakkatigit qinnuteqarpat imaluunniit pineqartoq toqukkuq qimaguppat.

Imm. 7. Siulittaasup tulliiisa ilaat ataaseq Inatsisartut Siulittaasoqarfianni ilaasortatut tunuarumalluni qinnuteqarpat imaluunniit pineqartoq peqqiilliornerminik, inuussutissarsiumminik assigisaannilluunniit pingaarutilimmik pissuteqarluni Inatsisartut Siulittaasoqarfianni ilaasortatut sulinngiffeqarallarumalluni qinnuteqarpat Inatsisartut aalajangissavaat qinnuteqaat akuerineqassanersoq. Inatsisartut ataatsimiinnerisa avataanni taamatut qinnuteqaatit Inatsisartut Siulittaasuannit Inatsisartut sinnerlugit aalajangiiffigineqarallartassapput. Aalajangiinerit Inatsisartut ataatsimiinneranni tullermi Inatsisartunut saqqummiunneqassapput.

§ 4. Inatsisartut Siulittaasoqarfiat Inatsisartut Oqaluuserisassanut Ataatsimiititaliaattut atuutissaaq. Siulittaasoqarfimmik qinersinissap tungaanut §1, imm. 1 naapertorlugu ilaasortaq sivilunerpaamik ilaasortaasimasunit angajulleq kiisalu ilaasortat marluk Inatsisartunit toqqakkat Oqaluuserisassanut Ataatsimiititaliaagallartutut atuutissapput. Oqaluuserisassanut Ataatsimiititaliap imaluunniit Oqaluuserisassanut Ataatsimiititaliaagallartup Inatsisartuni ataatsimiinnissanut oqaluuserisassat suliaralugillu aalajangersassavaat oqaluuserisassallu pillugit nassuiaammi inassuteqaatik Inatsisartunut saqqummiullugit. Nassuiaat isumaqatigiinniutigineqassangilaq.

Imm. 2. Inatsisartut Siulittaasoqarfiat ilaasortanik ataasiakkaarlutik partiinut kattuseqatigiinnulluunniit Siulittaasoqarfimmi ilaasortaataitaqanngitsunut ataasiakkaanut sinniisaasunik, Inatsisartunillu qinerneqartunik, ilaqartinneqarluni Inatsisartut Suleriaasiannut Ataatsimiititaliatut atuutissaaq. Inatsisartut peqatigitillugu partiit kattuseqatigiilluunniit, Siulittaasoqarfimmi ilaasortaataitaqanngitsut, ataasiakkaat sinniisigisaasa ataasiakkaat sinniisussaannik qinersisoqarsinnaassappat, sinniisussaannik taakkuninnga qinersissapput.

Imm. 3. Inatsisartut Siulittaasoqarfiat Inatsisartut sinnerlugit avammut kiinnertartuuvoq.

Imm. 4. Inatsisartut Siulittaasoqarfiata Inatsisartut aamma ataatsimiititaliat sulinerisa piareersaasiorneqarnerisa ingerlanneqarnerisalu pissusissaaq eqqorlugu ingerlanneqartarnissaat isumagisassavaa.

Imm. 5. Oqaluuserisassat inatsisartut ataatsimiinneranni oqaluuserisassatut ilanngunneqaqqullugit qinnutigineqartut ilusilivigineqarlutik saqqummiunneqarnissaannut maleruagassanik erseqqinnerusunik Inatsisartut Siulittaasoqarfiat aalajangersaasinnaavoq.

Imm. 6. Inatsisartut Siulittaasoqarfiata suliassat Suleriaatsimi aalajangersakkat naapertorlugit Siulittaasoqarfimmut saqqummiussat suliarisassavai. Siulittaasoqarfiup suliassat sugaluartullunniit Inatsisartunut Inatsisartunullu ilaasortanut tunngaviummik pingaaruteqartut suliarisinnaavai.

Imm. 7. Inatsisartut Siulittaasuat suliassani nukingiuttarialinni Inatsisartut Siulittaasoqarfiat sinnerlugu aalajangiisinnaavoq. Siulittaasup tullii Siulittaasup aalajangerneranik sapinngisamik piaartumik ilisimatinneqartassapput.

Imm. 8. Inatsisartut Siulittaasoqarfiata Inatsisartullu Suleriaasiannut Ataatsimiititaliap suleriaasissatik namminneerlutik aalajangersartassavaat.

Kapitali 3

Naalackersuisut

§ 5. Naalackersuisunut ilaasortat, Namminersorlutik Oqartussat suliassaqrifiinik ingerlatsisussat, Inatsisartut Naalackersuisullu pillugit inatsisartut inatsisaat naapertorlugu Inatsisartut qinertassavaat.

Imm. 2. Naalackersuisut Siulittaasuat Inatsisartunut ilaasortat akornannit amerlanerussuteqarluinnartut tunuliaqutaralugit qinerneqartassaaq.

Imm. 3. Naalakkersuisut Siulittaasuata Naalakkersuisunut ilaasortassat aalajangersimasumik amerlassusillit aqqisigut taasat qinerneqaqqullugit Inatsisartunut inassutigissavai. Qinersineq pissaaq Naalakkersuisut Siulittaasuata siunnersuutaasa ataatsikkoortillugit taasisutiginerisigut.

§ 6. Naalakkersuisunut ilaasortap Inatsisartunut ilaasortaangitsup Inatsisartunut qinigaasinnaaneq pillugu aalajangersakkat qanoq ilisukkulluunniit atuuttut naammassisimassavai.

Imm. 2. Inatsisartut suliaasat tassunga tunngassutillit § 1, imm. 3 naapertorlugu Qinigaanerup Misilinneqarnissaanut Ataatsimiititaliaagallartup imaluunniit § 7, imm. 1, nr. 2 naapertorlugu Qinigaanerup Misilinneqarnissaanut Ataatsimiititaliap inassuteqarneri malillugit aalajangiivigisassavaat.

Kapitali 4

Inatsisartuni ataatsimiititaliat

Ataatsimiititaliat inatsisit naapertorlugit pilersinneqartussat aamma ataatsimiititaliat ataavartut

§ 7. Inatsisartut inissitsiterlutik ataatsimiinnerminni inatsisartullu ukiuata aallartinnerani ataatsimiititaliat uku pilersissavaat:

- 1) Nunanut Allanut Sillimaniarnermullu Ataatsimiititaliaq.
- 2) Qinigaanerup Misilinneqarnissaanut Ataatsimiititaliaq.
- 3) Inatsiseqarnermut Ataatsimiititaliaq.

Imm. 2. Inatsisartut taamatuttaaq inissitsiterlutik ataatsimiinnerminni upernaakkullu ataatsimiinnerit tamaasa ataatsimiititaliat uku pilersissavaat:

- 1) Aningaasaqarnermut Ataatsimiititaliaq.
- 2) Kukkuinersuinerimut Ataatsimiititaliaq.

§ 8. Inatsisartut inissitsiterlutik ataatsimiinneranni inatsisartullu ukiuata aallartinnerani ataatsimiititaliat ataavartut allat, siulittaasoqarfiup inassuteqarneratigut Inatsisartunit pilersinneqassapput.

Imm. 2. Partiit qinersisarnerilluunniit eqqarsaatigalugit suleqatigiinnissamik isumaqatigiissuteqarsimasut toqqaasimasut ilaasortaq peqataasinnaatinnagu ataatsimiititaliani ilaasortaatititik sinniisussaqaqtissinnaavaat, tamanna partiit qinersisarnerilluunniit eqqarsaatigalugit suleqatigiinnissamik isumaqatigiissuteqarsimasut siumut Inatsisartut siulittaasuannut nalunaarutigisimappassuk.

§ 9. Inatsisartut ataatsimiititalianut ataasiakkaanut ilaasortanik tallimanik Naalakkersuisunut ilaasortaaqqusaangitsunik qinersissapput.

Imm. 2. Kalaallit Nunaata Folketingimi ilaasortaatitai marluk Nunanut Allanut Sillimaniarnermullu Ataatsimiititaliamit qinnuigineqarlutik ataatsimiititaliap ataatsimiinnerini taaseqataasinnaanatik peqataasinnaapput.

Imm. 3. Nunanut Allanut Sillimaniarnermullu Ataatsimiititaliaq immikkut isertuussisussaataitanermit pisussaaffiup ataatsimiititaliamut ilaasortanut allanullu ataatsimiititaliap oqallinnerinik malinnaasinnaasunut atuuttup eqquutsinneqarnissaata qularnaarneqarnissaanut suleriaatsimini sukumiinerusunik aalajangersaassaaq.

§ 10. Tamatuma peqatigisaanik Inatsisartut ataatsimiititalianut ataasiakkaanut ilaasortanut ataasiakkaanut sinniisussanik qinersissapput. Ilaasortaq peqataasinnaatinnagu sinniisussaq taassumunnga taartaalluni peqataasassaaq.

Imm. 2. Ataatsimiititaliamut ilaasortaq kiisalu taassuma sinniisussaa ataatsikkut peqataasinnaajunnaarallarpat, partiip qinersisarnerilluunniit eqqarsaatigalugit suleqatigiinnissamik isumaqatigiissuteqarsimasut qinnuteqarnerat naapertorlugu, Inatsisartut Siulittaasoqarfiat aalajangersinnaavoq partii qinersisarnerilluunniit eqqarsaatigalugit suleqatigiinnissamik isumaqatigiissuteqarsimasut ilaasortanut taartaasussamik taarsiitsigallarsinnaasut.

§ 11. Allamik aalajangersagaqartoqartinnagu ataatsimiititaliap siulittaasussani siulittaasullu tullissaa nammineerluni qinertassavai.

Imm. 2. Ataatsimiititaliap siulittaasuata isumagissavaa ataatsimiititaliami sulinerup sapinngisamik annertunerpaamik pingaartinneqarnissaa. Inatsisartut Siulittaasuat ataatsimiititaliamut siulittaasumut peqqusisinnaavoq ataatsimiititaliami sulinerup ingerlanera pillugu oqaasiinnarmik allagaqarluniluunniit nalunaaruteqaqqullugu.

§ 12. Ataatsimiititaliap suleriaasissani nammineerluni akuersissutigissavaa, taannalu Inatsisartut Siulittaasoqarfiannut akuersissutigisassanngorlugu inassutigineqassaaq.

Imm. 2. Ataatsimiititaliaq aalajangiisinnaassuseqarpoq ilaasortat affaanit amerlanerit peqataappata.

Imm. 3. Tamanna pissusissamisoortutut nalilerneqarpat ataatsimiititaliaq suliassaqarfini eqqarsaatigalugit ilaasortat akornanni suliassanik agguataarisinnaavoq.

§ 13. Ataatsimiititaliami oqaluuserineqartut tamanut tusarliunneqaqqusaanngillat.

Imm. 2. Ataatsimiititaliarli aalajangersinnaavoq nalunaarutit aalajangersimasumik annertussilerlugit killilikkat tamanut tusarliunneqarsinnaasut.

§ 14. Ataatsimiititaliap suliassaasa pingaarnersaraat siunnersuutit Inatsisartunit ataatsimiititaliamut innersuussat sularineqartarnissaat.

Imm. 2. Ataatsimiititaliaq, ilaatigut Naalakkersuisunut apeqquteqartarnermigut, suliassaqarfimmi iluani ingerlatsinermik malittarinninnissaminut pisussaavoq aammalu Naalakkersuisut inatsisitigut killissaritit iluanni ingerlatsinikkulluunniit ileqqorissaarnermut tunngatillugu killigitit iluanni ingerlatsinissaat nakkutigissallugu.

§ 15. Inatsisartut siunnersuummik suliarinninnermik nalaani qanoq ilisukkulluunniit siunnersuut ataatsimiititaliamut suliareqqitassanngorlugu innersuussinavaat, ataatsimiititaliaq siunnersuut pillugu siusinnerusukkut isumaliutissiissuteqarsimagaluarpalluunniit.

Imm. 2. Ataatsimiititaliap suliarinninnera naammassitsiillugu Inatsisartut suliarinninnertik unitsikkallassavaat.

§ 16. Ataatsimiititaliaq isumaqaruni siunnersuut ataatsimiititaliap allap suliassa qarfiinut attuumassuteqartoq Inatsisartut Siulittaasoqarfiata akuersineratigut ataatsimiititaliaq taanna qinnuigisinnaavaa siunnersuummik suliarinneqataaqqullugu.

Imm. 2. Siunnersuummik aappassaaneerlugu suliarinnilinnginnermi Inatsisartut Siulittaasoqarfiat taarsiullugu aalajangersinnaavoq ataatsimiititaliamut innersuussutaqqaartuugaluaq Inatsisartunut saqqummiuteqqinneqassasoq.

§ 17. Inatsisartut allatut aalajangersimatinnagit ataatsimiititaliaq inatsisartut inatsisissaattut imaluunniit Inatsisartut aalajangiiffigisassaattut siunnersuutini suliaqarnermi inernerit pillugit isumaliutissiissummik saqqummiussisassaaq. Ataatsimiititaliaq siunnersuutit Inatsisartunit ataatsimiititaliamut innersuunneqarsimasut pillugit isumaliutissiissusiortussaataavoq.

Imm. 2. Ataatsimiititaliap siunnersuutit arlallit imminnut attuumassuteqarluinnartutut isumaqarfigigunigit ataatsimoortillugit isumaliutissiissummi saqqummiussinnaavai.

Imm. 3. Ataatsimiititaliaq siunnersuut pineqartoq pillugu siusinnerusukkut isumaliutissiissusiorsimaguni ilassutitut isumaliutissiissummik saqqummiussisinnaavoq.

Imm. 4. Isumaliutissiissut imaluunniit ilassutitut isumaliutissiissut allaganngorlugu saqqummiunneqassaaq Inatsisartulli Siulittaasoqarfiata akuersineratigut oqaasiinnarmik saqqummiunneqarsinnaavoq.

Imm. 5. Isumaliutissiissut imaluunniit ilassutitut isumaliutissiissut saqqummiunneqarnerminit ullut unnuallu pingasut qaangiunnerisigut aatsaat Inatsisartunit suliarineqarsinnaalissaaq.

§ 18. Ataatsimiititaliaq siunnersuutini allanik, nassuiaatinik suliassanilluunniit allanik isumaliutissiissutinngorlugit saqqummiunneqartussaannngitsunik suliaqarnerminut atatillugu allaganngorlugu nalunaarusiorsinnaavoq.

Imm. 2. Pisuni immikkorluinnaq ittuni ataatsimiititaliaq Inatsisartut Siulittaasoqarfiata akuersineratigut allatigut suliaqarnini pillugu allaganngorlugu nalunaarusiorsinnaavoq.

Imm. 3. Imm. 1 aamma 2 naapertorlugit nalunaarusiat Inatsisartut ataatsimiittarfianni oqaluuserineqartussaannngillat.

§ 19. Ataatsimiititaliaq qanoq ilisukkulluunniit Naalakkersuisunut ilaasortamik isumasioqateqarumalluni aggersaasinnaavoq. Naalakkersuisunut ilaasortaq atorfilimmik ataatsimik tamatigut ingiallorteqarsinnaavoq. Naalakkersuisunullu ilaasortap atorfilinnik arlalinnik ingiallorteqarnissaa ataatsimiititaliap akuersissutigisinnaavaa.

Imm. 2. Ataatsimiititaliap naliliinera naapertorlugu Naalakkersuisunut ilaasortaq

pissutissaqavilluni peqataasinnaangippat immikkorluinnaq ittumik pissutissaqartoqartillugu isumasioqatigiinneq atorfilik ataaseq arlallilluunniit peqataatillugit ingerlanniarneqarsinnaavoq.

Imm. 3. Isumasioqatigiinnermi atorfilittami oqaaserisaanut Naalackersuisunut ilaasortaq akisussaavoq.

Imm. 4. Isumasioqatigiinnermut matoqqasumut tamanulluunniit ammasumut aggersaasoqarsinnaavoq. Tamanut ammasumik isumasioqatigiinnermut aggersaasoqarpat isumasioqatigiinnermi kikkulluunniit najuussinnaapput. Isumasioqatigiinneq tamanut ammasumik ingerlanneqartoq immiussissutinut immiussissutinulluunniit assigisaannut immiunneqassaaq.

§ 20. Inatsisartut inatsisissaattut imaluunniit inatsisartut aalajangiiffigisassaattut siunnersuut Inatsisartunut ilaasortamit ataatsimit arlallinnilluunniit saqqummiussaq ataatsimiititaliami oqaluuserineqaraangat siunnersuuteqartoq taannaluunniit sinnerlugu oqaaseqartuusussaq, ataatsimiititaliamut ilaasortaangikkaluarluni, siunnersuutip pineqartup ataatsimiititaliami oqaluuserineqarnerani najuussinnaatitaavoq, taamali pisoqartillugu taasisinnaatitaassanngilaaq imaluunniit oqaaseqaatiminik isumaliutissiissummut ilanngussaqaarsinnaatitaanani.

§ 21. Ataatsimiititaliaq suliassaqaarfimmi iluani apeqqutit tamanut tunngassuteqartut pillugit tusarniaanernik ingerlatsisarsinnaavoq, taakkunungalugu atatillugu kikkulluunniit isummaminnik saqqummiusseqqullugit qinnuigisinnaallugit.

Imm. 2. Ataatsimiititaliaq tusarniaanerup qanoq ilusilimmik ingerlanneqarnissaa pillugu erseqqinnerusumik aalajangiisassaaq, tassungalugu ilanngullugu tamanut ammasumik ingerlanneqarnissaanik apeqqut isummerfigisassallugu.

Imm. 3. Tusarniaaneq ataatsimiititaliat arlallit suleqatigiissutigisaattut ingerlanneqarsinnaavoq.

Imm. 4. Aammattaq ataatsimiititaliaq isumaliutissiissummik saqqummiussaqannginnermini soqutiginnillutik susassalinnut tusarniaaqaarsinnaavoq.

§ 22. Ataatsimiititalianut §§-ini 7, 8 aamma 23-mi taaneqartunut Inatsisartut Allattoqarfiannit atorfinitsinneqartumik ataatsimiititaliamut allatsitut atorfeqartitsisoqassaaq.

Imm. 2. Ataatsimiititaliap allattaa ataatsimiititaliap erseqqinnerusumik aalajangiinera malillugu ataatsimiinnissat piareersasiornernut, ataatsimiititaliap ataatsimiinnerisa imaqaarniliornerinut, paasissutissanik ataatsimiititaliap kissaatigisaanik pissarsiniarnernut kiisalu ataatsimiititaliap allagassaasa imassaannik siunnersuusiornernut suleqataasassaaq aammalu isumaliutissiissusiornernut nalunaarusiornernullu peqataasassalluni.

Ataatsimiititaliaagallartut

§ 23. Inatsisartuttaaq suliassat aalajangersimasut sularineqarnissaannut ataatsimiititaliaagallartunik pilersitsisinnaapput. Ataatsimiititaliaagallartoq atorunnaassaaq suliassaq imaluunniit suliassat, imminut suliakkiissutigineqartut naammassillugit

suliarineqareerpata. Ataatsimiititaliaq suliani pillugu Inatsisartunut allaganngorlugu nalunaarusiussaag. Nalunaarusiaq Inatsisartuni oqaluuserineqassaaq.

Kapitali 5

Siunnersuisoqatigiit aamma aalajangiisartutut ataatsimiititaliat il.il.

§ 24. Inatsisartut siunnersuisoqatigiinnut aamma aalajangiisartutut ataatsimiititalianut il.il. sinniisuutitassaminnik qinersissapput. Sinniisuutitat pineqartut piffissaq qinigaaffiat inatsisit, ileqqoreqqusat aalajangersakkalluunniit siunnersuisoqatigiinnut aalajangiisartutulluunniit ataatsimiititalianut il.il. atuuttut naapertorlugit aalajangersarneqartarpoq.

Imm. 2. Siunnersuisoqatigiinnut aamma aalajangiisartutut ataatsimiititalianut il.il. sinniisuutitassanik qinersineq sapinngisamik pisassaaq inatsisartut ataatsimiinneranni sinniisuutitat atuuttut qinigaaffiata naanissaata siulianiittumi.

§ 25. Inatsisartut Inatsisit Atortinneqarnerannut Ataatsimiititaliaata inassuteqarneratigut Inatsisartut Ombudsmandiannik aamma Inatsisartut Ombudsmandiannut Taartaasartumik Inatsisartut qinersissapput.

Imm. 2. Inatsisartut Kukkunersiuinermut Ataatsimiititaliaata inassuteqarneratigut Inatsisartut Nunatta Karsiata naatsorsuutaanik kukkunersuisussamik qinersissapput.

Kapitali 6

Qinersinerit qinerseriaatsillu

§ 26. Kinaluunniit Inatsisartuni ataatsimiititaliamut imaluunniit siunnersuisoqatigiinnut, aalajangiisartutut ataatsimiititaliamut il.il. ilaasortatut qinigaasinnaassaguni Inatsisartut ataatsimiittarfianni Inatsisartunut ilaasortamit siunnersuutigineqarsimasariaqarpoq.

Imm. 2. Qinersinerit tamarmik sivisunerpaamik ukiuni sisamani atuuttassapput, allamillu aalajangiisoqartinnagu qinersinerit taamaallaat piffissamut Inatsisartut qinigaaffiannut atuuttassallutik.

Imm. 3. Ataatsimiititalianut, siunnersuisoqatigiinnut aamma aalajangiisartutut ataatsimiititalianut il.il. ilaasortassanik marlunnik amerlanerusunilluunniit qinersisoqassatillugu qanoq amerlassuseqarneq najoqqutaralugu qinersisoqartassaaq.

§ 27. Inatsisartut Suleriaasiat una malillugu qanoq amerlassuseqarneq najoqqutaralugu qinersinerimi d'Hondtip periaasia aalajangersakkat makku malillugit atorneqartassaaq: Inatsisartunut ilaasortat immikkoortunut qinersinissami pineqartunut qanoq taaseqatigiikkumanerlutik Inatsisartut Siulittaasuannut nalunaarnerat naapertorlugu immikkoortiterneqartassapput. Taaseqatigiikkumasut amerlassusii ilaasortat qinerneqartussat amerlassusii apeqqutaatillugit 1-imik, 2-mik, 3-mik agguarneqartassapput. Kisitsisit taamaalillutik saqqummersut tunngavigalugit taaseqatigiikkumasut ataasiakkaat qanoq

tulleriinneqarlutik ilaasortaataqalissanersut aalajangerneqartassaaq. Kisitsisit marluk amerlanerilluunniit assigiippata qanoq tulleriinneqartitsinissaq makitsinikkut aalajangerneqassaaq.

Imm. 2. Inuk ataasiinnaq qinerneqartussaattillugu taasisut amerlanerussuteqavinnissaat piumasarineqarpoq. Qinigassanngortittut arlaannaalluunniit taaseqqaarnermi amerlanerussuteqarluinnartunit taaneqanngippat nutaamik taasisoqassaaq. Taasinermi tassanissaaq qinigassanngortittut arlaat amerlanerussuteqarluinnartunit taaneqanngippat qinigassanngortittut marluk aappasaanik taasinermi amerlanerpaanit taaneqartut taasisutigalugit pingajussaanik taasisoqassaaq. Taasinerit naligiippata qinersineq makitsinikkut aalajangiiffigineqassaaq.

Kapitali 7

Inatsisartut inatsisissaattut siunnersuutit aamma Inatsisartut Suleriaasiat

§ 28. Inatsisartut inatsisissaattut siunnersuutit inatsisissatut ilusilerigaallutik aammalu nalinginnaasumik immikkullu nassuiaatinik, taamatullu aamma siunnersuutip aningaasatigut allaffissornikkullu kingunerisassaannik allaaserinninnermik, ilaqartinneqarlutik tunniunneqartassapput. Inatsisartut inatsisissaattut siunnersuutit taaguuserneqarsimasuusassapput.

Imm. 2. Aammattaaq inatsisartut inatsisaata inatsisartulluunniit peqqussutaata allanngortinneqarnissaanik atorunnaarsinneqarnissaanilluunniit siunnersuuteqarnermi siunnersuut taanna Inatsisartut inatsisaata allanngortinneqarnissaanik atorunnaarsinneqarnissaanilluunniit siunnersuutit taaguuserneqassaaq. Aamma inatsisartut inatsisaata inatsisartulluunniit peqqussutaata allanngortinneqarnissaanik atorunnaarsinneqarnissaanilluunniit inatsisartut inatsisissaattut siunnersuutit allannguutip pingaarnertut imarisaanik ersersitsisumik qulequtaaralerneqarsimassapput.

Imm. 3. Taakku saniatigut inatsisartut inatsisissaattut siunnersuuteqarnermi § 4, imm. 5 naapertorlugu siunnersuuteqarsinnaanermut najoqqutassat erseqqinnerusut qaqugukkulluunniit atuuttut, Inatsisartut Siulittaasoqarfiannit aalajangersakkat, eqquutitinneqartassapput.

Imm. 4. Inatsisartut inatsisissaattut siunnersuutip Inatsisartunut saqqummiunneqarnissaa kissaatigineqaraangat tamanna siunnersuuteqartup Inatsisartut Siulittaasuannut allakkatigut nalunaarutigisassavaa, taassumalu siunnersuut, agguanneqareeraangat, Inatsisartuni oqaluuserineqartussatut nalunaarutigisassavaa, taamaattorli § 39, imm. 2 takuuk.

§ 29. Inatsisartut inatsisissaattut siunnersuutit inaarutaasumik akuersissutigineqarsinnaalinnginnerminni Inatsisartunit pingasoriarlugit oqaluuserineqartassapput.

Imm. 2. Siunnersuuteqartoq Siulittaasoqarfiup akuersineratigut siunnersuutip siullermeerlugu oqaluuserineqalinnginnerani siunnersuutini taassumalu kingunerisassai pillugit naatsumik nassuiaateqarsinnaavoq.

Imm. 3. Siunnersuut siullermeerneqarnermini tunngaviusumik isummat kiisalu allannguutissatut siunnersuuteqartoqarnissaanik ilimasaarisimasinnaanerit malillugit ataatsimut isigalugu oqaluuserineqartassaaq. Siunnersuut oqaluuserineqareeraangami aappassaaniigassanngortinneqartassaaq, Inatsisartullu aalajangertassavaat aappassaaneerlugu oqaluuserineqalinnginnermini ataatsimiititaliamut oqaluserisassanngorlugu innersuussutigineqassanersoq. Ataatsimiinnermik aqutsisup inassuteqarnera tunngavigalugu Inatsisartut ilanngullugu aalajangertassavaat siunnersuut ataatsimiititaliamut sorlermut innersuunneqassanersoq.

§ 30. Aapassaaneerinninneq siullermeerinninnerup naammassinnerata isumaliutissiisummilluunniit saqqummiussinerup kingorna siusinnerpaamik ullut pingajussaanni pisinnaavoq.

Imm. 2. Aappassaaneeraluni oqaluuserinninnerup kingorna siunnersuut qanoq iluseqartinneqarluni pingajussaaniigassanngortinneqassanersoq taasinikkut aalajangerneqartassaaq. Allannguutissatut siunnersuutit siulliullugit taasisutigineqartassapput.

Imm. 3. Tamatuma kingorna siunnersuut pingajussaaniigassanngortinneqassaaq, Inatsisartullu aalajangissavaat siunnersuut tamanna sioqqullugu ataatsimiititaliami siusinnerusukkut isumaliutissiissusiorsimasumi ataatsimiititaliamiluunniit allami nutaamik oqaluserisassanngorlugu innersuussutigineqassanersoq.

§ 31. Pingajussaaneerinninneq aappassaaneerinninnerup naammassinnerata imaluunniit isumaliutissiisummik ilassutitulluunniit isumaliutissiisummik saqqummiussinerup kingorna siusinnerpaamik ullut pingajussaanni pisinnaavoq.

Imm. 2. Allannguutissatut siunnersuutit isummerfigineqareeraangata Inatsisartut siunnersuut inaarutaasumik ilusilik naatsumik oqaluserisinnaavaat, tamatumalu kingorna siunnersuut inaarutaasumik ilusilik taasisutigineqassalluni.

Imm. 3. Siunnersuut inaarutaasumik akuersissutigineqartoq Inatsisartut Siulittaasuannit inatsisartullu allattaanerannit atsiorneqartassaaq, tamatumalu kingorna Naalackersuisut Siulittaasuannut nassiuunneqartassalluni.

§ 32. Inatsisartut inatsisissaattut siunnersuutit pillugit maleruagassat malillugit aamma Inatsisartut Suleriaasissaattut siunnersuutit aamma Inatsisartut Suleriaasiannut allannguutissatut siunnersuutit suliarineqartassapput.

Kapitali 8

Inatsisartut aalajangiiffigisassaattut siunnersuutit

§ 33. Inatsisartunut ilaasortap, partiip Naalackersuisulluunniit inatsisiliornissamik imaluunniit inatsimmik pioreersumik allanngortitsinissamik atorunnaarsitsinissamilluunniit siunnersuutaat inatsisartut aalajangiiffigisassaattut siunnersuutit saqqummiunneqartassapput. Siunnersuut

tunngavilersugaassaaq siunnersuutillu aningaasatigut allaffissornikkullu kingunerisassai allaaserineqarsimassallutik, aalajangiiffigisassatut ilusilerneqarsimassalluni taaguuserneqarsimallunilu.

Imm. 2. Matumanissaaq § 28, imm. 4 atorneqassaaq.

Imm. 3. Inatsisartut aalajangiiffigisassaattut siunnersuutit aamma tulliniittut suliarineqartassapput:

- 1) Inatsisartut nunat tamalaat akornanni suliniaqatigiiffinni ilaasortaataqarfigisaanni aalajangersakkanik Inatsisartut akuersissutiginninnissaannik siunnersuutit. Siunnersuutit Inatsisartut ilaasortaataasa siulittaasuannit saqqummiunneqartassapput.
- 2) Nutaanik aningaasaliissuteqarnissamik oqaasertaliussaqaarnissamillu imaluunniit aningaasaliissutinik oqaasertaliussanillu allanngortitsinissamik qinnuteqaatit Inatsisartut Aningaasaqarnermut Ataatsimiititaliaannut suliarisassanngortinneqartut.
- 3) Siunnersuutit tunngaviusumik isigisariallit allat, Inatsisartunit aalajangiiffigisallugit pingaarutillit.

Imm. 4. Danskít naalakkersuisuisa siunnersuutaat Naalakkersuisunit saqqummiunneqartassapput.

Imm. 5. Imm. 1-imi taaneqartutut Inatsisartut aalajangiiffigisassaattut siunnersuut Inatsisartunit akuersissutigineqarpat Inatsisartut inatsisissaattut siunnersuuterpiatut saqqummiunneqarnermigut imaluunniit nalunaarutinngorlugu atuutilersinneqarnermigut piaartumik atuutilersinniarnissaa Naalakkersuisut pisussaaffigisavaat.

Imm. 6. Siunnersuutit imm. 1-imi aamma 3-mi taaneqartut saniatigut Naalakkersuisunit siunnersuutit tullini taaneqartut Inatsisartut aalajangiiffigisassaattut siunnersuutit suliarineqartassapput:

- 1) Nunatta Karsiata naatsorsuutaasa akuersissutigineqarnissaannik siunnersuutit.
- 2) Akileraarutitigut ilanngaatit il.il. aalajangersaavigineqarnissaat pillugit siunnersuutit.
- 3) Inatsisit Danmarkimi atuuttut Kalaallit Nunaannut atortussanngortinniarneqartut pillugit Inatsisartut oqaaseqaatissaattut siunnersuutit.
- 4) Nunat tamalaat akornanni isumaqatigiissutit, nunat tamalaat nalinginnaasumik isumaqatigiissutaat il.il. akuersissutigittinniarneqartut pillugit Inatsisartut oqaaseqaatissaattut siunnersuutit.
- 5) Siunnersuutit allat inatsisit allat naapertorlugit Inatsisartunit oqaaseqaateqarfineqartariaqartut.

Imm. 7. Inatsisartut aalajangiiffigisassaattut siunnersuutit, inaarutaasumik aalajangiiffigineqartinnagit, marloriarlugit suliarineqartassapput. Siullermeerlugu suliarineqalinnginnerani siunnersuuteqartoq siunnersuumminut kingunerisassaanullu naatsumik nassuiaateqarsinnaavoq. Inatsisartut aalajangerpata Inatsisartut aalajangiiffigisassaattut siunnersuut ataatsimiititaliamut suliarineqartussanngortinneqassasoq, ataatsimiinnermik aqutsisup Inatsisartunut inassutigissavaa ataatsimiititaliaq sorleq siunnersuummik suliarinnittuussanersoq. Taama pisoqartillugu kapitali 4 tamarmiusoq naapertorlugu ataatsimiititaliaq isumaliutissiissusiortassaaq, pissutsit pineqartut qanoq ittuuneri tunngavialugit

allaassutaasinnaasut arajutsinaveersaarlugit.

Imm. 8. Aalajangiiffigisassatut siunnersuutininut allannguutissatut siunnersuutit pineqartillugit kapitali 9 atuuppoq, pissutsit pineqartut qanoq ittuuneri tunngavigalugit allaassutaasinnaasut arajutsinaveersaarlugit.

Kapitali 9

Allannguutissatut siunnersuutit

§ 34. Inatsisartut inatsisissaannut aamma Inatsisartut Suleriaasiannut allannguutissatut siunnersuuteqartoqarsinnaavoq. Allannguutissatut siunnersuut siunnersuutip aappassaaneerlugu oqaluuserineqarnerani Inatsisartunut ilaasortamit kimilluunniit, Naalakkersuisunit, ataatsimiititaliamit, ataatsimiititaliami amerlanerussutilinnit ikinnerussutilinnillu saqqummiunneqarsinnaavoq. Ataatsimiititaliaq, ataatsimiititaliami amerlanerussutilit ikinnerussutililluunniit isumaliutissiissusiornermikkut allannguutissatut siunnersuummik saqqummiussisassapput. Siunnersuutip pingajussaaneerlugu oqaluuserineqarnerani Naalakkersuisut, ataatsimiititaliaq, ataatsimiititaliami amerlanerussutilit ikinnerussutilillu imaluunniit Inatsisartunut ilaasortat sisamat ataatsimoorlutik allannguutissanik siunnersuuteqarsinnaapput. Ataatsimiititaliaq, ataatsimiititaliami amerlanerussutilit ikinnerussutililluunniit ilassutitut isumaliutissiissuteqarnermikkut allannguutissanik siunnersuuteqartassapput.

Imm. 2. Aammattaaq Inatsisartut aalajangiiffigisassaattut siunnersuutininut allannguutissanik siunnersuuteqartoqarsinnaavoq. Aalajangiiffigisassatut siunnersuutip siullermeerlugu oqaluuserineqarnerani Inatsisartunut ilaasortat kikkulluunniit aamma Naalakkersuisut allannguutissanik siunnersuuteqarsinnaapput. Aalajangiiffigisassatut siunnersuutip aappassaaneerlugu oqaluuserineqarnerani Naalakkersuisut, ataatsimiititaliaq, ataatsimiititaliami amerlanerussutilit ikinnerussutilillu imaluunniit Inatsisartunut ilaasortat sisamat ataatsimoorlutik allannguutissanik siunnersuuteqarsinnaapput. Ataatsimiititaliaq, ataatsimiititaliami amerlanerussutilit ikinnerussutililluunniit isumaliutissiissuteqarnermikkut allannguutissanik siunnersuuteqartassapput.

Imm. 3. Allannguutissatut siunnersuutit allaganngorlugit oqaasertaligaassapput. Aammattaaq imm. 1 malillugu allannguutissatut siunnersuutit § 28, imm. 1 naapertorlugu nassuiaatitaqartinneqassapput.

Imm. 4. Siunnersuutip allannguutissatut siunnersuusiorfigineqartup Inatsisartuni oqaluuserineqarnissaa kingusinnerpaamik ullormik ataatsimik sioqqullugu allannguutissatut siunnersuut I- natsisartunut ilaasortanut agguanneqareersimassaaq.

Imm. 5. Ilaasortap siunnersuutigisinnaavaa allannguutissatut siunnersuusiornermikkaq pissutigalugu oqaluuserinninneq kipitinneqarallassasoq. Tamatuma kingorna Inatsisartut aalajangissapput oqaluuserinninneq allannguutissatut siunnersuummik saqqummiussisoqarnissaa siunertaralugu kipitinneqarallassanersoq.

Imm. 6. Allannguutissatut siunnersuummut allannguutissamik siunnersuuteqartoqarsinnaavoq

(allannguutissatut siunnersuummut allannguutissatut siunnersuut) imm. 1 - 5-imi aalajangersakkat malillugit.

Imm. 7. Siunnersuut, allannguutissatut siunnersuut allannguutissatulluunniit siunnersuummut allannguutissatut siunnersuut tunuartinneqaruni aalajangersakkami matumani maleruagassat naapertorlugit allanit saqqummiuteqqinneqarsinnaavoq.

Imm. 8. Matumanissaaq § 39, imm. 2 atorpeqassaaq.

Kapitali 10

Nassuiaatit

§ 35. Naalackersuisut pisortat suliassaataat pillugit Inatsisartunut nassuiaateqarsinnaapput.

Imm. 2. Naalackersuisut Inatsisartunut taamatut nassuiaateqarumappata tamanna Naalackersuisut Inatsisartut Siulittaasuannut nalunaarutigissavaat, taassuma nassuiaat agguanneqareerpat Inatsisartunut nalunaarutigissavaa.

Imm. 3. Nassuiaatit isumaqatigiinniutigineqartussaangillat.

Imm. 4. Immikkorluinnaq ittumik pisuni Inatsisartut Siulittaasoqarfiat isumaqatigiinniutiginnittoqarnissaanik akuersisinnaavoq.

Imm. 5. Naalackersuisunilli nassuiaatit tulliini taaneqartut tamatigut isumaqatigiinniutigineqartassapput:

1) Naalackersuisut Siulittaasuata Inatsisartut ukiuata aallartinnerani Inatsisartunut nassuiaataa.

2) Naalackersuisut Siulittaasuata Inatsisartunut qinigaarlaanut nassuiaataa.

3) Nunanut allanut tunngasutigut naalackersuinikkut ingerlatsineq pillugu nassuiaat.

4) Aningaasaqarniarnikkut ingerlatsineq pillugu nassuiaat.

5) Nassuiaatit inatsisit malillugit Naalackersuisunit Inatsisartunut saqqummiunneqartussaataasut, taakkulu isumaqatigiinniutigineqarnissaat Naalackersuisut kissaatigippassuk.

Imm. 6. Aammattaaq Naalackersuisut Siulittaasuata apeqqutit inuiaqatigiinnut kalaallinut immikkut pingaarutillit pillugit Inatsisartunut nassuiaateqarsinnaavoq. Nassuiaat taamaattoq isumaqatigiinniutigineqartassaaq.

Imm. 7. Nassuiaammik isumaqatigiinniutiginnittoqartussaattillugu taassuma isumaqatigiinniutigineqalinnginnerani nassuiaasiap imarisaa pingaarneq pillugu Naalackersuisut naatsumik nassuiaateqarsinnaapput.

Imm. 8. Nassuiaatit pillugit oqallinnermi Inatsisartunut ilaasortat partiillu inatsisartut oqaaseqaateqarnissaannut siunnersuummik saqqummiussisinnaapput. Siunnersuut taamaattoq allakkatigut naatsumik tunngavilersuutitalerlugu ataatsimiinnermik aqutsisumut nalunaarutigineqassaaq, oqallinnermullu ingerlanneqartumut pissusissamisoortumik attuumassuteqartuussalluni. Inatsisartut oqaaseqaateqarnissaannut siunnersuummut atatillugu allannguutissatut siunnersuuteqartoqarsinnaanngilaq. Nassuiaatit pillugit oqallinnermi taamaalilluni inatsisartut oqaaseqaataat ataasiinnaq akuersissutigineqarsinnaavoq. Inatsisartut

oqaaseqaateqarnissaannut siunnersuut ataaseq akuersissutigineqarpat, inatsisartut oqaaseqaatissaattut siunnersuutaajunnartut ataatsimiinnermik aqutsisumut nalunaarutigineqartut, sulili taasissutigineqanngitsut, atorunnaassapput. Nassuiaammik oqallisiginninnerup nalaani allatut ilusilimmik aalajangiisoqarsinnaanngilaq.

Kapitali 11

Apeqquteqaatit aallaavigalugit oqallinnerit aamma Naalackersuisunut apeqqutit

§ 36. Inatsisartunut ilaasortap pisortat suliassaataat Inatsisartuni oqaluuseritinniaruniuk kiisalu Naalackersuisunut ilaasortap tamanna pillugu nassuiaateqarnissaa Naalackersuisunulluunniit ilaasortat arlallit nassuiaateqarnissaat piumasariguniuk taamatut kissaateqarnini Inatsisartut Siulittaasuannut erseqqissumik allaganngorlugu tunniutissavaa, taassumalu apeqquteqaat agguanneqareerpat Inatsisartut ataatsimiinneranni Inatsisartunut nalunaarutigissavaa.

Imm. 2. Inatsisartut aalajangissavaat apeqquteqaat saqqummiunneqassanersoq. Oqaluuserinneqqaarani akuersisoqarpat apeqquteqaatip imarisaa pingaarneq siulittaasup naalackersuisunut ilaasortamut aperineqartumut, Naalackersuisunulluunniit ilaasortanut aperineqartunut nalunaarutigissavaa. Naalackersuisunut ilaasortaq apeqquteqaateqarfigineqartoq isumaqaruni suliassap pineqartup oqaluuserineqarnissaa nunap soqutigisaanut akornutaassasoq apeqquteqaateqartoq tamanna pillugu nalunaarfigissavaa, tamatumalu kingorna apeqquteqaat atorunnaassaaq.

Imm. 3. Apeqquteqaatigineqartoq oqaluuserinninneq aallartitsinnagu tunuartinneqaruni allanit saqqummiunneqarsinnaanngilaq.

Imm. 4. Apeqquteqaat aallaavigalugu oqallinnermi Inatsisartunut ilaasortat partiillu inatsisartut oqaaseqaateqarnissaannut siunnersuummik saqqummiussinnaapput. Siunnersuut taamaattoq allakkatigut naatsumik tunngavilersuutitalerlugu ataatsimiinnermik aqutsisumut nalunaarutigineqassaaq, oqallinnermullu ingerlanneqartumut pissusissamisoortumik attuumassuteqartuussalluni. Inatsisartut oqaaseqaateqarnissaannut siunnersuummut atatillugu allannguutissatut siunnersuuteqartoqarsinnaanngilaq. Apeqquteqaat pillugu oqallinnermi taamaalilluni inatsisartut oqaaseqaataat ataasiinnaq akuersissutigineqarsinnaavoq. Inatsisartut oqaaseqaateqarnissaannut siunnersuut ataaseq akuersissutigineqarpat, inatsisartut oqaaseqaatissaattut siunnersuutaajunnartut ataatsimiinnermik aqutsisumut nalunaarutigineqartut, sulili taasissutigineqanngitsut, atorunnaassapput. Apeqquteqaammik oqallisiginninnerup nalaani allatut ilusilimmik aalajangiisoqarsinnaanngilaq, takukkilli §§-it 50-miit 52-mut.

Naalackersuisunut apeqqutit

§ 37. Inatsisartunut ilaasortaq pisortat suliassaataat pillugu paasissutissinneqarnissaminik kissaateqaruni tamanna Naalackersuisunut apeqqutit saqqummiussinnaavaa. Apeqqut allaganngorlugu Inatsisartut Siulittaasuannut saqqummiunneqassaaq, taassumalu apeqqut

agguaanneqareerpat Inatsisartunut nalunaarutigissavaa. Apeqqut naatsumik erseqqissumillu ilusilerneqassaaq aammalu tunngavilersuutitaqassalluni.

Imm. 2. Naalackersuisut apeqqut akissuteqarfigisinnaanagu nalunaarpata suliarinera taamaalilluni naammassineqassaaq.

Imm. 3. Inatsisartut Siulittaasuata isumagissavaa Naalackersuisut akissutaata apeqquteqartumut ingerlateqqinneqarnissaa, taamatullu aamma apeqqutip akissutillu Inatsisartunut ilaasortanut takusassiarineqarnissaa.

Imm. 4. Apeqqutit akissuteqartoqarnissaata tungaanut tunuartinneqarsinnaapput. Apeqqut allanit saqqummiunneqarsinnaanngilaq.

Imm. 5. Inatsisartut ataatsimiinnerisa piareersaasiorneqarnerannut atatillugu Inatsisartut Siulittaasoqarfiat sapaatip akunneranut ataasiarluni nalunaaquttap akunneranik ataatsimik sivisussusilimmik apeqquteqarfissamik aalajangersaasinnaavoq, Inatsisartunut ilaasortat oqaatigalugu nalunaarutigeqqaarnagulu Naalackersuisunut ingerlaannartumik akisassamik apeqquteqarfigisinnaasaannik. Sapaatip akunneranut ataasiarluni nalunaaquttap akunneranik ataatsimik sivisussusilimmik apeqquteqarfissami aaljangiisoqarsinnaanngilaq. Imm. 2 taamatutaaq atorineqassaaq.

Kapitali 12

Inatsisartut katersuuttarneri ataatsimiittarnerilu

Tunngaviusut

§ 38. Inatsisartut ukiuat septembarip qaammataani tallimanngornerit pingajuanni aallartittarpoq ukiullu tulliani tallimanngorneq taanna tikillugu ingerlasarluni.

Imm. 2. Inatsisartut ukiuata ingerlanerani Inatsisartut ikinnerpaamik marloriarlutik ileqquusumik ataatsimiittassapput.

Imm. 3. Inatsisartut Siulittaasuata pisariaqartileraangagu imaluunniit Naalackersuisut Siulittaasuata piumasarigaangagu Inatsisartunulluunniit ilaasortat ikinnerpaamik affaasa piumasarigaangassuk Inatsisartut piffissaagallartillugu sioqqutsisumik nalunaarfigineqareernertik tunngavigalugu immikkut ittumik ataatsimiittassapput. Immikkut ittumik ataatsimiinnerni suliassat immikkut ittumik ataatsimiigiaqqusinermut tunngavigineqartut kisimik Inatsisartuni oqaluuserineqartassapput.

Imm. 4. Inatsisartut ukiakkut ileqquusumik ataatsimiinnermini inatsisartut ukiuanni ileqquusumik ataatsimiinnissamik qaqugu pinissaat aaljangertassavaat.

*Oqaluuserisassat ilusilerneqarnissaannut piumasaqaatit,
oqaluuserisassat, piffissat oqaluuserisassanik tunniussivissat*

§ 39. Inatsisartut ataatsimiinneranni oqaluuserisassanut ilanngutitinniakkat oqaluuserisassanik ilusiliinissamut saqqummiussinissamullu piumasaqaatit Inatsisartut Suleriaasianni matumani aalajangersakkat, inatsisini allani aalajangersakkat imaluunniit Inatsisartut Siulittaasoqarfiannit §

4, imm. 5 naapertorlugu aalajangerneqartut naapertorlugit suliarineqarsimasassapput.

Imm. 2. Oqaluuserisassanut ilanngutitinniakkat ilusiliinissamut saqqummiussinissamullu piumasaqaatinik imm. 1-mi aalajangersarneqartunik eqquutsitsinngitsut Inatsisartut Siulittaasoqarfiannit itigartitsissutigineqarsinnaapput.

§ 40. Oqaluuserisassat, Inatsisartut oqaluuserisassaattut ilanngutitikkumasat, kingusinnerpaamik Inatsisartut ataatsimiinnissaata pineqartup aallartinnissaa sapaatip akunnerinik tallimanik sioqqullugu piumasaqaatit naapertorlugit saqqummiunneqassapput, Inatsisartulluunniit Siulittaasuannut tunniunneqarlutik.

§ 41. Immikkorluinnaq ittunik pisoqartillugu piffissaliussat Inatsisartut Suleriaasianni matumani aalajangersakkat Inatsisartut Siulittaasoqarfiannit sanioqqunneqarsinnaapput.

§ 42. Siunnersuutit, nassuiaatit, apeqquteqaatit apeqqutillu ilusiliinissamut piumasaqaatit naapertorlugit allaganngorlugit saqqummiussat Inatsisartulluunniit Siulittaasuannut tunniussat ullormi saqqummiunneqarfimminni tunniunneqarfimminiluunniit nalunaarsorneqartassapput. Siunnersuutit il.il., oqaaseqatigiinni siullerni taasat, ulluinnarni nal. 12.00-ip kingornagut saqqummiussat tunniunneqartulluunniit ulluinnarmi tullermi saqqummiussatut tunniussatulluunniit nalunaarsorneqartassapput. Aamma taamaappoq siunnersuutinut il.il. arfininngornikkut nalliuttuniluunniit saqqummiunneqartunut tunniunneqartunulluunniit tunngatillugu.

Imm. 2. Inatsisartut Siulittaasuata siunnersuutit il.il. saqqummiussat tunniunneqartulluunniit agguanneqarnissaat nalunaarutigineqarnissaallu pisussaaffigaa. Nalunaarutiginninneq oqaluuserisassanut ilanngunneqarsinnaavoq.

§ 43. Inatsisartut Siulittaasoqarfiat Inatsisartut ataatsimiinnerinut oqaluuserisassat siunnersuutaagallartumik Inatsisartunut naammaginartumik akuttussusilimmik nalunaaruteqartassaaq. Nalunaarutiginninneq allagarsiussamut innersuussinikkut pisinnaavoq.

Imm. 2. Taassuma saniatigut ullup Inatsisartut ataatsimiiffiata naammassinnginnerani ullormi tullianik ataatsimiiffissami oqaluuserisassat ataatsimiinnermik aqutsisumit nalunaarutigineqareertassapput.

Imm. 3. Ataatsimiinneq aallarereersimatillugu ataatsimiinnermi oqaluuserisassat tullerriaarnerat Inatsisartut allanngortissinnaavaat.

Imm. 4. Inatsisartut akuersiseqqaarnagit suliassat nutaat ataatsimiinnermi oqaluuserisassanut ilanngunneqarsinnaanngillat.

§ 44. Siunnersuutit, apeqquteqaatit suliassalluunniit allat danskit naalackersuisuinit imaluunniit Naalackersuisunit tuaviortutut isigineqartut inatsisartut ataatsimiinneranni pineqartumi oqaluuserisassanut ilanngunneqaqqullugit Naalackersuisut Inatsisartut Siulittaasoqarfiannut qinnuteqarsinnaapput.

Inatsisartut ataatsimiinneri

§ 45. Inatsisartunut ilaasortat ikinnerpaamik affaat najuuppata taaseqataappatalu Inatsisartut aalajangiisinnaassuseqarput. Ilaasortaq taaseqataasinnaassaguni inimi ataatsimiiffimmi nammineerluni najuutissaaq.

Imm. 2. Ilaasortat nikuillutik qarasaasiatigulluunniit atortulersuutit atorlugit taasisassapput. Taamaattorli kapitalit 4 aamma 5 naapertorlugit ataatsimiititalianut il.il. ilaasortassanik qinersisoqartillugu ilaasortat amerlanerussutillit piumasarigaangassuk allakkatigut taasisoqartassaaq.

Imm. 3. Ataatsimiinnermik aqutsisoq isumaqaruni ilaasortat tamarmik isumaqatigiittut, siunnersuut taasinertaqanngitsumik akuersissutigineqartoq itigartitsissutigineqartorluunniit nalunaarutigisinnaavaa. Inatsisartunullu ilaasortap kialuunniit taasisoqarnissaa piumasarisinnaavaa. Inatsisartut inatsisissaattut siunnersuutip pingajussaaneerpeqarnerata naammassinerani imaluunniit aalajangiiffigisassatut siunnersuutip aappassaaneerpeqarnerata naammassinerani tamatigut taasisoqartassaaq.

Imm. 4. Aalajangigaq oqaluuserineqarfigisamini aalajangiiffigineqartoq allanngortinneqarsinnaanngilaq.

§ 46. Allamik aalajangiisoqarsimatinnagu aalajangiinerit tamarmik amerlanerussuteqarnikkut pisassapput.

Imm. 2. Taasinermi siunnersuummut isumaqataasut akerliusullu amerlaqatigiippata siunnersuut atorunnaassaaq.

Imm. 3. Siunnersuutit Inatsisartut ataatsimiinnerminni inaarutaasumik aalajangeriigaat aatsaat ataatsimiinnermi tassani allanngortinneqarsinnaapput Inatsisartunut ilaasortat tamarmiusut 3/5-iisa tamanna akuersissutigippassuk.

Ataatsimiinnermik aqutsineq

§ 47. Inatsisartut Siulittaasuat imaluunniit tullia siulleq, aappaa, pingajuat aamma sisamaat isumaqatigiissuteqarnertik malillugu Inatsisartut ataatsimiinnerannik aqutsisassapput.

Imm. 2. Inatsisartut Siulittaasoqarfiannut ilaasortaq suliamik Inatsisartunut saqqummiunneqartumik saqqummiussisusoq imaluunniit oqaaseqartuusoq suliap oqaluuserineqarnerata nalaani ataatsimiinnermik aqutsisusinnaanngilaq.

§ 48. Suleriaatsimut ilanngussami tulleriinnilersuineq nalunaarneqartoq malillugu oqallinneq ingerlanneqassaaq.

Imm. 2. Oqaaseqarumasooq kinaluunniit ataatsimiinnermik aqutsisumut saaffiginnittassaaq, taassumalu Inatsisartunut ilaasortat oqaaseqarumallutik saaffiginninneri malillugit tullerriaarlugit oqaaseqartittassavai. Ataatsimiinnermik aqutsisoq partiit oqaaseqartuunut, oqaluuserisat

aalajangersimasut naammassillugit oqaluuserineqarnissaannut kiisalu Inatsisartunut ilaasortat arlaata naatsumik oqaaseqarniarluni kissaateqarneranut atatillugu immikkut aalajangiisinnaavoq. Ataatsimiititaliami ikinnerussuteqartut oqaaseqartuat, ikinnerussuteqartut ilaasortamik ataasiinnarmilluunniit inuttaqaralarpata, oqaaseqartutut isigineqassaaq.

Imm. 3. Inatsisartuni oqallinnermi suleriaatsimut ilanngussami oqaaseqarnermi piffissaliussatut nalunaarsukkat atuutissapput.

§ 49. Ilaasortat Naalackersuisunullu ilaasortat Inatsisartut oqaluttarfianniit oqaaseqartassapput. Taamaattorli malitsigisaanik oqaaseqaatit malitsigisaanillu apeqquteqaatit ataatsimiittarfimmi oqaluttup issivianit saqqummiunneqartassapput. Ataatsimiinnermik aqutsisup kisimi oqaaseqarnerit kipitissinnaavai.

Imm. 2. Ilaasortat Naalackersuisunullu ilaasortat ataatsimiinnermik aqutsisup ataatsimiinnermi pissuserissaarnissaq pillugu aalajangiineri tamaasa naalattassavaat aammalu ataatsimiinnermi pissuserissaarnissaq allanit malinneqanngikkaangat ataatsimiinnermik aqutsisoq ilisimatittassallugu.

Imm. 3. Ataatsimiinnermik aqutsisup ilaasortaq Naalackersuisunulluunniit ilaasortaq ataatsimiinnermi pissuserissaarnissamik siusinnerusukkat peqquneqaralarluni naalasseriitsoq oqaaseqarniarluni kissaataanik itigartissinnaavaa.

Imm. 4. Ataatsimiinnermi eqqissiviillioortoqalerpat ataatsimiinnermik aqutsisup ataatsimiinneq unitsissavaa pisariaqartikkuniullu kinguartissinnaallugu.

Imm. 5. Inatsisartut pissuserissaarnissaq pillugu maleruagassaannik ilaasortaq annertuumik sanioqqutsippat, ullut ataatsimiiffiusut 14-it tikillugit ilaasortaq Inatsisartut ataatsimiinnerinit Inatsisartut Siulittaasoqarfiata peqataasussaajunnaarsissinnaavaa. Peqataasussaajunnaarsinneqarnermi nalaani ilaasortaq Inatsisartut ataatsimiititaliaasa ataatsimiinnerini aammattaaq peqataasinnaanngilaq. Ilaasortaq peqataasussaajunnaarsitaasoq piffissami peqataasussaajunnaarnermini aningaasarsiaqassanngilaq.

§ 50. Ataatsimiinnermik aqutsisup imaluunniit Inatsisartunut ilaasortap siunnersuutigisinnaavaa oqaluuserinneq naammassineqassasoq, tamannalu Inatsisartut oqaluusereqqinnagu aalajangiiffigissagaat.

§ 51. Inatsisartunut ilaasortap suliap sulluunniit oqaluuserineqarnerani siunnersuutigisinnaavaa oqaluuserisassamut tullermut ingerlaqqittoqassasoq. Siunnersuut taamaattoq ataatsimiinnermik aqutsisumut nalunaarutigineqassaaq, allaganngorlugulu tunngavilersuummik naatsumik ilaqartinneqarluni. Tamanna taasinikkut aalajangiiffigineqassaaq. Siunnersuut akuerineqarpat oqaluuserisaq pineqartoq atorunnaassaaq.

§ 52. Oqaluuserisassamut tullermut ingerlaqqittoqarnissaanik siunnersuut tunngavilersuummigit Naalackersuisunik imaluunniit Naalackersuisunut ilaasortamik tatiginninnginnermik tunngaveqartinneqarpat siunnersuut taamaattoq aatsaat

oqaluuserineqartumut pissusissamisoortumik attuumassuteqaruni oqaluuserineqarsinnaavoq.

Imm. 2. Taamatulli oqaluuserisassanngortitsineq pisinnaanngilaq Inatsisartut ammaanersiorlutik oqallinneranni.

Ataatsimiinnerit ammasuuneri

§ 53. Inatsisartut ataatsimiinneri tamanut ammasuupput. Taamaattorli Inatsisartut aalajangersinnaavaat suliassat ataasiakkaat matoqqasumik ataatsimiinnermi oqaluuserineqassasut. Suliassap matoqqasumik sularineqarnissaanut tunngavissaqarnersoq pillugu apeqqut matoqqasumik oqaluuserineqassaaq, tamanna Inatsisartut ataatsimiinnermilluunniit aqutsisup aalajangerpassuk.

Imm. 2. Taamaattorli Inatsisartunit nersornaasiinissat taamaaqataannillu tunniussinerit tamatigut matoqqasumik ataatsimiissutigineqartassapput. § 24 naapertorlugu siunnersuisoqatigiiffinnut, aalajangiisartutut ataatsimiititalianut il.il. sinniisussanik qinersinerit taamatuttaaq tamatigut matoqqasumik ingerlanneqartassapput.

§ 54. Inatsisartut ataatsimiinneri kalaallit oqaasii atorlugit ingerlanneqartassapput. Inatsisartunut ilaasortat kalaallisut oqalussinnaanngitsut danskisut oqalussinnaapput kalaallisuunngortillugit nutserneqartussanik, soorlu aamma ataatsimiinnerit danskisut malinnaaffigineqarsinnaassasut.

§ 55. Inatsisartut ataatsimiissutaat Inatsisartut Siulittaasoqarfiata nakkutigisaanik kalaallisut danskisullu tamanut saqqummiunneqartassapput. Saqqummiussineq Inatsisartut nittartagaatigut pisassaaq.

Kapitali 13

Ilaasortatut tunuarneq, sulinngiffeqarallarneq il.il.

§ 56. Inatsisartunut ilaasortaq Inatsisartunit tunuarumalluni qinnuteqaateqarpat Inatsisartut aalajangissavaat qinnuteqaat akuerineqassanersoq. Inatsisartunut qinersinermi qinersinermik allattaavimmi sinniisussat allattorsimaffianni ilanngunneqarsimalluni sinniisussaq qinikkatut sulinnginnissaminik qinnuteqarpat qinnuteqaat akuerineqarsinnaanersoq Inatsisartut aalajangissavaat. Qinnuteqaat Inatsisartut ataatsimiinnerata avataatigut saqqummiunneqarpat Inatsisartut sinnerlugit Inatsisartut Siulittaasoqarfiata aalajangissavaa qinnuteqaat akuerineqassanersoq.

Imm. 2. Inatsisartunut ilaasortaq peqqiilliornerninik, naartunerminik erninerminilluunniit, inuussutissarsiutiminik assigisaanilluunniit pingaarutilimmik pissuteqarluni Inatsisartunit sulinngiffeqarallarumalluni qinnuteqarpat Inatsisartut Siulittaasoqarfiata aalajangissavaa

qinnuteqaat akuerineqarsinnaanersoq.

Imm. 3. Inatsisartunut ilaasortaq Inatsisartut ataatsimiinneranni peqataasinnaangikkallassaguni Inatsisartut Siulittaasuannut nalunaassaaq. Inatsisartut Siulittaasoqarfiata aalajangissavaa suut pissutissavittut naatsorsuunneqassanersut.

§ 57. Naalackersuisunut ilaasortaq Naalackersuisunit tunuarniuteqarpat Inatsisartut aalajangissavaat qinnuteqaat akuerineqarsinnaanersoq.

Imm. 2. Naalackersuisunut ilaasortaq peqqiilliornini allamilluunniit pingaarutilimmik pissuteqartumik sulinngiffeqarnissamik qinnuteqarpat Naalackersuisut Siulittaasuata aalajangissavaa qinnuteqaat akuerineqarsinnaanersoq.

Imm. 3. Naalackersuisunut ilaasortaq sulinngiffeqarallarnissaminik akuerineqarpat imaluunniit Inatsisartut ataatsimiinneranni peqataasinnaangikkallarpat Naalackersuisut Siulittaasuata Inatsisartut Siulittaasuannut nalunaarutigissavaa taassuma suliassaarfii kimit isumagineqarallassanersut.

§ 58. Inatsisartunut ilaasortaq oqartussaassusiiagaappat, ilaasortaanerminut tunuarpat, toquppat, sulinngiffeqarallarnissaminut akuerineqarpat imaluunniit pissutissaqavilluni ataatsimeeqataasinnaajunnaarpat sinniisussaa Inatsisartut ataatsimiinnerinut peqataajartoqqullugu ataatsimiigiaqquneqassaaq. Tamanna aamma pisassaaq Inatsisartunut ilaasortap qinigaasinnaanernik annaasaqarneranik Inatsisartut aalajangiigaangata.

Imm. 2. Ilaasortaq ataatsimiinnermi ataatsimeeqataasinnaangikkallartillugu sinniisussaq peqataajartoqqullugu ataatsimiigiaqquneqassanersoq Inatsisartut Siulittaasoqarfiannit aalajangiiffiqartassaaq. Sinniisussap qinigaasinnaassuseqarnera § 7, imm. 1, nr. 2 naapertorlugu Qinigaanerup Misilinneqarnissaanut Ataatsimiititaliamit misissorneqartassaaq, tamatumalu kingorna taanna Inatsisartunut inassuteqaateqartassaaq. Ilaasortaq sulinngiffeqarallareersimalluni imaluunniit pissutissaqavilluni ataatsimeeqataangikkallareerluni Inatsisartunut ilaasortatut sulileqqippat sinniisussaa tunuassaaq.

Kapitali 14

Inatsisartut allaffeqarfiat Inatsisartullu ataanni suliffeqarfiit

§ 59. Inatsisartuni tjenestemanditut atorfillit sulisullu allat akissaateqarfiit 39-anni tassanngaluunniit qaffasinnerusumi inissisimasut Inatsisartut Siulittaasoqarfiannit atorfinitsinneqarlutillu soraarsinneqartassapput.

Imm. 2. Inatsisartut allaffeqarfianni sulisut allat Inatsisartut Siulittaasuannit imaluunniit Siulittaasup taamaaliornissamut piginnaatitaanit atorfinitsinneqarlutillu soraarsinneqartassapput.

Imm. 3. Inatsisartut Ombudsmandiata sulisuni atorfinitsillugillu soraarsittassavai.

Imm. 4. Inatsisartut Allattoqarfianni sulisut aammalu Inatsisartut Ombudsmandianni sulisut akissarsiaat Inatsisartut Siulittaasuannit aalajangersarneqartassapput.

Imm. 5. Tjenestemandit Inatsisartut suliffeqarfiini atorfillit pillugit Inatsisartut inatsisaanni nr.

4-mi, ulloq 20. maj 1998-imeersumi, § 50 naapertorlugu Inatsisartut Allattoqarfianni tjenestemandit aamma Inatsisartut Ombudsmandianni tjenestemandit soraarnerussutisiaqartinneqassapput maleruagassat Namminersorlutik Oqartussani tjenestemandinut atuuttut malillugit.

§ 60. Inatsisartut missingersuutissaattut siunnersuutit, missingersuutinik Inatsisartut Ombudsmandiannit pissarsianik ilallit, sulisoqarnikkut killissarititaasussatut kissaatigineqartunik pisariaqarnera malillugu nassuiaatitaqartussat, Inatsisartut Siulittaasoqarfiannit suliarineqartassapput. Inatsisartut Siulittaasoqarfiat Inatsisartut Suleriaasiannut Ataatsimiititaliamut inassuteqaateqartassaaq, taassumalu siunnersuut piffissaalluarallartillugu aningaasallu ukiuannut tulliuttumut Inatsisartut aningaasanut inatsisissaattut siunnersuummut ilanngunneqarsinnaanngorlugu naammassillugu suliarissavaa. Missingersuutissatut siunnersuut Inatsisartut Suleriaasiannut Ataatsimiititaliap akuerisaa aningaasat ukiuannut tulliuttumut inatsisartut aningaasanut inatsisissaattut siunnersuutip suliarineqarnissaanut atugassanngorlugu Naalackersuisut Siulittaasuannut ingerlatinneqassaaq, inassuteqaatigalugu aningaasaliissutissat Inatsisartunut tunngasut katinneri inatsisissatut siunnersuummut ilanngussami 1-imi ilanngunneqassasut, missingersuutillu katitigaaneri aningaasanut inatsisissatut missingersuutitut ilanngussanut ilanngunneqassasut.

Imm. 2. Taamatuttaaq inatsisartut ilassutitut aningaasaliissutissaattut siunnersuummi Inatsisartunut tunngatillugu ilanngutitinniakkat, Inatsisartut Ombudsmandiata ilanngutitikkumasaanik pissarsianik ilallit, Inatsisartut Siulittaasoqarfiannit suliarineqartassapput. Inatsisartut Siulittaasoqarfiat Inatsisartut Suleriaasiannut Ataatsimiititaliamut inassuteqaateqartassaaq, taassumalu siunnersuut piffissaalluarallartillugu aningaasallu ukiuanni pineqartumi inatsisartut ilassutitut aningaasaliissutissatut inatsisissaattut siunnersuummut ilanngunneqarsinnaanngorlugu naammassillugu suliarissavaa.

Kapitali 15

Aalajangersakkat allat

§ 61. Inatsisartunut nutaamik qinersinertaqanngitsumik Inatsisartut Naalackersuisut atuukkunnaarsippatigit Naalackersuisunillu nutaanik qinersillutik piffissap qinigaaffiup sinneranut Inatsisartut nutaamik inissitsitissallutik aalajangersinnaapput.

Imm. 2. Imm. 1 malillugu inissitsiternermi nutaamik qinersisoqareernermi inissitsiternerq pillugu aalajangersakkat atorneqassapput, taamaattorli allannguutinik Inatsisartut aalajangigaannik allannguuteqartinneqarsinnaallutik.

§ 62. Inatsisartut allagaataasa isumannaatsumik paarineqarnissaat Inatsisartut Siulittaasoqarfiata isumagissavaa.

Kapitali 16

Atuutilersitsineq

§ 63. Suleriaasissaq manna ulloq 1. december 2010 atuutilerpoq.

Imm. 2. Kalaallit Nunaanni Inatsisartut Suleriaasiat 4. november 1999-imeersoq ulloq 23. maj 2000-imi, ulloq 19. oktober 2001-imi, ulloq 8. april 2003-mi, ulloq 28. november 2008-mi aamma ulloq 9. april 2010-mi allannguutitalik suleriaasissap matuma atuutilernera peqatigalugu atuukkunnaarsinneqarpoq.

ILANNGUSSAQ

OQAASEQARNERMI PIFFISSALIUSSAT

(piffissat oqaaseqarnerup sivisunerpaaffigisinnaasai minutsinngorlugit nalunaagaapput)

Inatsisartut inatsisissaannut Inatsisartullu peqqussutissaannut siunnersuutit:

Siullermeerinnineq

Saqqummiussineq - qinnuteqareernikkut	10 min.
Naalakkersuisut akissuteqaataat - qinnuteqareernikkut	10 min.
Oqaaseqartartut (partii ataaseq apeqqutit pingasut)	15 min.
Malitsigisaanik oqaaseqaatit akissuteqaatillu	2 min.
Siunnersuuteqartup inaarutaasumik oqaaseqarnera (partii ataaseq apeqqutit marluk)	5 min.
Naalakkersuisut inaarutaasumik oqaaseqarnerat (partii ataaseq apeqqutit marluk) (apeqqutit akissutillu tamarmik 2 minutter)	15 min.

Aappassaaneerinnineq

Naalakkersuisut akissuteqaataat - qinnuteqareernikkut	10 min.
Oqaaseqartartut (partii ataaseq apeqqutit pingasut)	15 min.
Malitsigisaanik oqaaseqaatit akissuteqaatillu	2 min.
Siunnersuuteqartup inaarutaasumik oqaaseqarnera	5 min.
Naalakkersuisut inaarutaasumik oqaaseqarnerat (partii ataaseq apeqqutit marluk) (apeqqutit akissutillu tamarmik 2 minutter)	10 min.

Pingajussaaneerinnineq: Allannguutissatut siunnersuutinik saqqummiussisoqartinnagu

Naalakkersuisut akissuteqaataat	5 min.
Oqaaseqartartut (partii ataaseq apeqqutit pingasut)	2 min.
Malitsigisaanik oqaaseqaatit akissuteqaatillu	2 min.
Siunnersuuteqartup inaarutaasumik oqaaseqarnera	5 min.
Naalakkersuisut inaarutaasumik oqaaseqarnerat (partii ataaseq apeqqutit pingasut) (apeqqutit akissutillu tamarmik 2 minutter)	5 min.

Pingajussaaneerinnineq: Allannguutissatut siunnersuutinik saqqummiussisoqartillugu

Naalakkersuisut akissuteqaataat – qinnuteqareernikkut	5 min.
Oqaaseqartartut (partii ataaseq apeqqutit pingasut)	10 min.
Malitsigisaanik oqaaseqaatit akissuteqaatillu	2 min.
Siunnersuuteqartup inaarutaasumik oqaaseqarnera	5 min.
Naalakkersuisut inaarutaasumik oqaaseqarnerat (partii ataaseq apeqqutit marluk) (apeqqutit akissutillu tamarmik 2 minutter)	5 min.

Inatsisartut aalajangiiffigisassaattut siunnersuutit:

Siullermeerinnineq

Saqqummiussineq – qinnuteqareernikkut	5 min.
Naalakkersuisut akissuteqaataat - qinnuteqareernikkut	5 min.
Oqaaseqartartut (partii ataaseq apeqqutit pingasut)	15 min.
Malitsigisaanik oqaaseqaatit akissuteqaatillu	2 min.
Naalakkersuisut inaarutaasumik oqaaseqarnerat (partii ataaseq apeqqutit marluk)	5 min.
Siunnersuuteqartup inaarutaasumik oqaaseqarnera (partii ataaseq apeqqutit marluk) (apeqqutit akissutillu tamarmik 2 minutter)	5 min.

Aappassaaneerinnineq

Inatsisartut inatsisissaattut peqqussutissaattullu siunnersuutit pingajussaaneerreqarnerini oqaaseqarnermi piffissaliussat assigaat.

Nassuiaatit:

Inatsisartut inatsisissaattut peqqussutissaattullu siunnersuutit siullermeerreqarnerini oqaaseqarnermi piffissaliussat assigaat.

Ammaanermi oqallinnerit:

Oqaaseqartartut (partii ataaseq apeqqutit pingasut)	30 min.
Malitsigisaanik oqaaseqaatit akissuteqaatillu	2 min.
Naalakkersuisut inaarutaasumik oqaaseqarnerat (apeqqutit akissutillu tamarmik 2 minutter)	20 min.

Apeqquteqaatit aallaavigalugit oqallinnerit:

Saqqummiussineq – qinnuteqareernikkut	10 min.
Naalakkersuisut akissuteqaataat – qinnuteqareernikkut	10 min.
Oqaaseqartartut (partii ataaseq apeqqutit pingasut)	10 min.
Malitsigisaanik oqaaseqaatit akissuteqaatillu	2 min.
Naalakkersuisut inaarutaasumik oqaaseqarnerat	5 min.
Apeqquteqaateqartup inaarutaasumik oqaaseqarnera (apeqqutit akissutillu tamarmik 2 minutter)	5 min.

Suliap annertunerata tamanna pisariaqalersippagu oqaaseqarnissamut piffissaliussatut aalajangersakkat avaqqunneqarnissaat Siulittaasoqarfiup akuersissutigisinnaavaa. Oqaaseqarnissamut piffissaliussap sivitsorneqarnissaa pillugu saaffiginnineq ataatsimiinnisaaq pineqartoq kingusinnerpaamik ullunik marlunnik sioqqullugu pisariaqarpoq.